

**U nastavku
akcije Pandora
uhapšene još
tri osobe**

SUSPENZIJA ZA UPOSLENIKE UIOBiH

- Rješenje o suspenziji važi od dana kada im je određena mjera pritvora, kaže Kovačević
- Trojica uhapšenih saradivala sa Sadikovićem • Đurić i dalje u bjekstvu

U nastavku akcije Pandora pripadnici Granične policije BiH jučer su na području Skelana uhapsili još tri osobe osumnjčene za carinske prevare i kriminal, nakon čega su one privedene u prostorije Državne agencije za istrage i zaštitu (SIPA). Ovo nam je potvrđeno jučer u SIPA. Kako saznajemo, radi se o Almedinu Rožajcu, Harisu Krujeziju i Nuriji Škilji, osobama bliskim Anesu Sadikoviću, uhapšenom u akciji Pandora.

Disciplinski postupak

Uhapšeni u prošlosedmičnoj akciji Zdravko Cvjetinović, pomoćnik direktora Sektora za carine Uprave za indirektno oporezivanje BiH, njegov brat Zdravko, zatim Milenko Nikić, bivši šef Carinske ispostave Brod, Janko Jovanović, šef ispostave Brod, te Miroslav Kragulj, također uposlenik UIOBiH, od jučer su pod suspenzijom, potvrdio nam je Ratko Kovačević, portparol Uprave.

- Danas je (jučer, op. a) napravljeno rješenje o suspenziji navedenih uposlenika, a rješenje će im biti uručeno od dana od kada im je određena mjera pritvora, pojašnjava Kovačević, ističući da za ostale uposlenike UIO, koji su uhapšeni u pomenutoj akciji, a kojima je Sud odredio mjere zabrane, još nisu dobili zvanično rješenje Suda "zbog čega se i ne mogu izjasniti o daljnjim mjerama".

Kovačević je istakao i da će protiv suspendovanih uposlenika biti pokrenut disciplinski postupak. U akciji Pandora trebao je biti uhapšen i Radovan Đurić, ali je policiji u zadnji tren umakao. Na



Dosad uhapšeno više od 30 osoba

sjednici koja je održana prošle sedmice, po prijedlogu Tužilaštva o određivanju pritvora, uhapšeni Janko Jovanović je kazao da vjeruje da je Đurić otišao na planirani odmor, ali nikako da je pobjegao van BiH. Đurić, za kojim je raspisana međunarodna potjernica, i jučer je bio u bjekstvu. Do zaključnja ovog izdanja Oslobođenja on nije uhapšen. Inače, u akciji Pandora, pripadnici Državne agencije za istrage i zaštitu (SIPA) su uhapsili Kemala Čauševića, nekadašnjeg direktora UIOBiH, zatim Aliju Mašića, bivšeg šefa Carinske ispostave Sarajevo, bivšeg šefa carinske ispostave Gradiška Nedeljka Milovanovića, Avdiju Škahića, jednog od aktuelnih čelnika Carine Brod, i Anesa Sadikovića. Istraga je navodno otvorena i protiv Gorana Marinkovića, Edina Nukića, Alмира Kadića, Nedeljka Milovanovića, Jasne Liović, Svete Miljića, Ljubomira Vlainića, Dragana Tomića...

Oni se terete za organizirani kriminal, poreznu utaju ili prevaru, carinsku prevaru, pranje novca i zloupotrebu položaja ili ovlaštenja, u vezi sa uvozom tekstilne i druge robe u BiH. Čauševiću, Sadikoviću, braći Cvjetinović, Nikiću, Jovanoviću, Kragulju, te Enisi Imširović i Jusufu Čosoviću određen je pritvor zbog sumnje da bi boravkom na slobodi mogli da utječu na svjedoke, ometaju istragu ili da ponove krivično djelo.

Blokiranje imovine

Mjere zabrane određene su Aliji Mašiću, Almiru Kadiću, Damiru Kožulu, Sveti Miljiću, Ljubomiru Vlainiću, Draganu Tomiću, Dejanu Paviću, Nerminu Hrustiću, Aleksandru Petroviću, Hajrudinu Muminoviću, Faruku Šušnjaru, Danijelu Stojčiću, Bori Marjanoviću, Radanu Kuzma-

noviću, Miši Novkoviću, Veseļku Starčeviću, Edvinu Aduloviću, Dejanu Nožici, Mirku Iviću i Josipu Kovačeviću. Akcija Pandora je uslijedila nakon okončanja višemjesečne istrage pokrenute zbog koruptivnih krivičnih djela organiziranog kriminala, carinskih i poreznih utaja, nezakonitog opraštanja poreza i povrata PDV-a, pranja novca, te zloupotrebe položaja ili ovlaštenja u vezi sa uvozom tekstilne i druge robe u BiH. U ovom predmetu se provodi i finansijska istraga, sa ciljem blokiranja i oduzimanja nezakonite imovinske koristi i imovine u višemilionskim iznosima koju su uhapšeni stekli.

U Tužilaštvu BiH jučer nam je rečeno da novih hapšenja i raspisivanja potjernica za sada u ovom predmetu neće biti, te da se istraga nastavlja.

A. BRKIĆ - ČEKIĆ